



# D Wooghoof-Strizzi geehn uff d Gass!

Bisch e Bebbi? – Oder fascht?  
 Läbsch in dr Freihait? – oder im **Knascht**?  
 Uns isch s egaal! Das waisch Du doch!  
 Will: Fir jeede Knaschty git s e «**Loch**»!

Dr **Wooghoof** isch – das waiss e Jeede –  
 fir **Schtrizzi**, Gängschter oder Bleede,  
 dr ainzyg Ort, wo «Haimet» git,  
 wenn s dr Schtaatsaawalt so witt!

Hesch e Schyssdrägg baut im Lääbe  
 und muesch in Zuekunft Gugge klääbe,  
 denn närv dy nit ab dääre Quaal!  
 Will Knascht isch «like **cheese** in **emmental**»!  
 Hoggensch zwar ainsam in dr Zälle,  
 losch Dy vom Wärter zämme-gälle...  
 Nur hoggsch im «**Loch**», denn waisch es doch:  
 Z Basel het s im «**Loch**» e **Loch**!

Kasch mit em Leffel vo dr Suppe,  
 zämme mit Inträssensgruppe,  
 hinter dr Maschine zem Koch-Wesch koche  
**lochend** fir e **Loch maloche**!  
 Und kasch denn – waisch was fir e Gschpass –  
 via fremdy Kuchy «ab uff d **Gass**!»

Dr **Gass** – das wär dr «Chef der Schugger» -  
 maint numme no: «Jä hools dr Gugger!  
 Jetzt sin ys allwäg – wirgglig – doch,  
 wider 3 (A...-)**Lecher** ab dur s **Loch**!»  
 ... merggsch es Gass? S wird langsam jääs!  
 Dr **Wooghoof** isch dr rainschty Kääs!

Das bringt sogar d Teppyg-Etaasche  
 vom FCB in groossy Raasche:  
 Wenn s bymene Näschtli **Lecher** hett,  
 het s sicher Veegel! Jeedy Wett!  
 Und Veegel wette s Fliege fertyg griege!  
 Drum losst men au dr Vogel fliege! ...  
 Dr Murat sells denn wider richte  
 ... und als (A...) **Loch** go d **Lecher** dichte!

Das Problem kasch als wie meeh  
 bym EHCee nit wirgglig gseh!  
 Will s ainzyg **Loch**, wo die dert schitze,  
 dien d Geegner als Pögg-yy**loch-Loch** nitze!  
 Dr Erfolg drvoo liggt uff dr **Gass**:  
 Kai Punkt uff dr **Woog** – uns au kai **Gschpass**!

Do isch dr Muurer Ueli besser!  
 Und mit sym Gripen-Fluugy kesser! :  
 Är will dä Flieger!!! (im Groosse Ganze)  
 und suecht e **Loch** in de Finanze!  
 Dangg Bundes-Kääs khas bald so wytt syy!  
 (Isch dr Ueli au e **Wooghoof-Strizzi**?)

Doch zrugg uff Basel und sym Knascht:  
 (Uns **Strizzi lecheret** das fascht!)  
 Bisch e Bebbi und woohnsch im **Loch**?  
 Raizt dy s Fasnachtslääbe doch?  
 Denn nimm dr Wäg, wo ally nämme!  
 Muesch dy drfir nit wirgglig schämme!  
 Kumm uff dr Waage! Und ab uff d **Gass**!  
 Mit uns zämme hesch dr **Gschpass**!  
 ... und irgend-wo und irgend-naime ...  
 bringe mr dy wider in **Wooghoof** haim!

*D Ladäärne-Uusstellig uff em Minschterplatz und d Waage-und Reggwisyte-Uusstellig bi dr Kasäärne sin vom Määntig znacht bis am Mittwoch demoorge! Deert und an de 3 Verkaufsständ (CINS) in dr Stadt ka men au alli Zeedel und Schnitzelbängg, d Blaggedde und dr Rädäbäng kaufe.*

*Uffbasse!*

*D'Zeedellääsete isch am Sunntig noh dr Fasnacht 2013 am 24. Hornig am ene neye Ort: im Lokal vo dr Baseldytschi Bihni im Lohnhof, 17–19 h. Dr Ytritt isch vergääbe, me ka 's Tringge aber am Ort bstelle.*